

## Christliche Leichpredigt.

Lucæ 10.v.20.

Pfalm: 12.v.6.

Proverb: 10.v.7.

Syr: 44.v.14.

Syr: 49.v.1.

Eccles: 7.v.2.

sind/wie Christus der Herr ganz tröstlich redet/Luc: 10. cap:  
Vnd des Gerechten nimmermehr vergessen wird/sondern ewig-  
lich im Segen bleibet/wie im 12. Psalm/vnd Proverbiis 10. cap:  
geschrieben stehet: So soll auch billich solcher Leut Gedechtnuß  
bey vns gar thewer vnd werth sein / vnd ihre Namen in vnser  
Herzen geschrieben werden/das sie stets bleiben/ihr Ruhm nicht  
vntergehe / auch ihrer auff Erden nimmermehr vergessen werde/  
Sondern das wir stets von ihrer Weißheit reden / vnd ihr Lob  
verkündigen / wie Syrach sagt / Syr: 44. cap: Auff das wir  
allerseits vns beydes danckbarlich als gegen die Wohlthäter er-  
zeigen / vnd denn auch alle Zucht / Tugend vnd Erbarkeit von  
ihnen studirn vnd lernen mögen. Vnd eben zu solchem Ende/  
gibt auch die heilige Göttliche Schrift selber allen Frommen  
vnd Gerechten ihr Lob / ja sie will es auch ernstlich / das es ihnen  
von andern vnd vns ebener massen soll gegeben werden: Ja  
wenn es nur die Zeit dulden wolte / so köndten wir solches Lobs  
sehr viel Exempel aus heiliger Schrift beybringen: So jemand  
lust hat/der mag lesen das 11. Cap: an die Ebreer / vnd 44. Cap:  
des lieben Syrach/vnd was volget / so wird er den Augenschein  
befinden vnd einnemen. Vnd das ich jetzt aller ander geschwei-  
ge / ist dieses ein sehr herzliches vnd denckwürdiges Lob / welches  
von einem recht hochgeehrten vnd unverdecktigen Lobsprecher  
von Gott dem Heiligen Geist dem frommen Christlichen Kö-  
nige Josia gegeben / vnd allererst nach seinem Ableiben auffge-  
zeichnet vnd beschrieben ist/darauf wir jetzt ein Stück zum Text  
dieser Leichpredigt mit einander haben hören ablesen: Welches  
Lob bezeuget vnd darthut / das Syrach am 49. Cap: nicht ver-  
geblich vnd ohne vrsach gesaget: Der Name Josias sey wie ein  
edel Reuchwerck aus der Apothecken/Sintemal das gedechtnuß  
seiner sonderbaren Gottesfurcht immer so frisch vnd lieblich  
reucht / das sein Gerüche viel besser / denn gute Salbe / in Pre-  
digten Salomonis am 7. Cap: Vnd ein jeglicher/dem Tugend  
lieb